

Habitat — — — Mus. *Schönherr*.

Magnitudo *L. Sutoris*, sed thorace longiore quam in congeneribus. Caput punctulatum nigrum, maculis punctisque pallide-testaceis; sulcus longitudinalis e vertice ad medium frontis ductus. Labrum & mandibularum latera testacea. Antennæ corpore multo longiores, fusco-testaceæ. Thorax latitudine longior, subcylindricus, basi apiceque truncatus, lateribus in medio rotundatus, utrinque tuberculo minuto armatus; supra rugulosus, antice linea transversa impressa, postice duabus; totus fusco-brunneus, pube luride-testacea inductus. Scutellum semiorbiculare, pallide testaceum. Elytra ad basin truncata, thorace multo latiora illoque plus duplo longiora; angulis humeralibus rotundatis; posteriorius angustata, apice oblique truncata angulo exteriori subrecto mutico, suturali rotundato; supra parum convexa, punctulata, basi granulosa, tota dilute fusco-brunnea, pube pallidius testacea irrorata; in medio singuli elytri macula parva denudata nigra nitida. Corpus subtus fusco-brunneum, pube brevi pallidior obductum; pedes concolores, antici nonnihil elongati, dentate parvo ante apicem tibiæ armati.

D A L M.

232) L A M I A M Y O P E: mutica fusco-grisea atropunctata & pube lutescenti nebulosa; thorace maculis atris subocellaribus oblongis, elytris cæcis.

Habitat in Finlandia. Mus. *Schönherr*.

Statura omnino & summa affinitas *L. curculionoidis*, sed paullo minor & vere distincta videtur. Differt præsertim ocellis thoracis magis remotis, haud orbiculatis potius oblongis, elytris omnino cæcis, punctis plurimis atris conspersis, quæ in *L. curculionoide* vix detegenda, magisque lutescenti-nebulosis &c.

Caput deflexum fronte plana, griseum, pube lutescenti variegatum, unde oriuntur puncta 4 inter antennis maculæque duo verticis distinctiora. Antennæ corpore longiores, subtus ciliatæ, articulo primo magno fusco, reliquis rufescentibus apice obscuris, (omnino ut in *L. curculionoide*.) Thorax transversus antice posticeque truncatus, lateribus paullo calloso-rotundatis, dorso depressus, scabrosus, fusco-griseus, maculis 4 atris remotis; anteriores lineares, lineolis parallelis lutescenti-pubescentibus cinctæ, posteriores breviores utrinque maculis lutescentibus circumdatæ; maculæ pubescentes

præterea hinc et inde sparsæ præsertim ad latera. Scutellum minutum testaceo-pubescens. Elytra thorace multo latiora, latitudine haud duplo longiora, basi truncata humeris sub-prominulis, apice rotundata, dorso depressa; fusco-grisea, pubescentia, punctis atris dispersis, nebulisque irregularibus e pube longiore lutescente variegata; anterius granulata, posterius punctata. Corpus subtus fusco-griseum, maculis lutescentibus adpersum; pedes breves validi, corpore concolores.

Specimina duo similia consului, D A L M.

233) L A M I A V E R M I C U L A R I S: nigra, lineolis albis flexuosis irrorata; thorace rugoso utrinque bituberculato, ventre maculis duabus villosis lutescentibus; antennis brevibus annulatis.

Habitat in Nova Hollandia, a Dom. *Hooker* communicata nomine *L. vermicularis* *Donovan*. Mus. *Schönh.*

Magnitudo *L. Textoris*. Antennæ corpore breviores nigrae, articulis basi albidis. Caput nigrum, fronte æquali lineolis albidis variegata, ore albo-piloso. Thorax latitudine paullo brevior, antice posticeque truncatus, lateribus parum rotundatus, obsolete bituberculatus, dorso subdepressus, totus rude rugosus niger, pube tenuissima albida parcius adpersus. Scutellum subcordatum nigrum læve, litura albida. Elytra thorace multo latiora illoque triplo longiora, humeris prominulis callosis, lateribus subrectis marginatis, apice rotundata subtruncata, supra modice convexa, nigra opaca, ubique rivulis lineolisque flexuosis albo-pubescentibus, vermicularibus, egregie variegata. In medio singuli elytri lineæ duæ longitudinales elevatae, nitidiores, ante apicem evanescentes; elytra ipsa ad basin et versus marginem rugosa et punctata, versus suturam posticeque lævia. Corpus subtus nigrum rivulis albis variegatum; in segmento secundo abdominis utrinque macula maxima dense at breviter lutescenti-villosa. Pedes breves validi, mutici, corpori concolores.

D A L M.

234) L A M I A R U G I C O L L I S: obscure umbrino-lutescens, thorace mutico transversim plicato, elytris concinne albo-punctatis, apice truncatis.

Hab. in Nova Hollandia, Dom. *Hooker*. A Dom. *Schneider* quoque missa, nomine *L. gutturalis*. — Mus. *Schönherr*.